



Facilis Et Succincta S.S. Canonum Doctrina

Pirhing, Ehrenreich

Dilingæ, 1690

§. VII. De consecratione Episcopi electi & confirmati.

[urn:nbn:de:hbz:466:1-61641](#)

S. VII.

*De Consecratione Episcopi electi,
& confirmati.*

Consecrationem Episcopi electi sequitur consecratio, uti colligitur ex c. provide 44. b. t. in 6. juncta Gloss. V. *Consecrationes.* Debet autem hæc consecratio, sine speciali gratiâ obtentâ, non differti sine legitimo impedimento ultra tres menses, à die confirmationis acceptæ numerandos, sub certis pœnis à jure tam antiquo, quam novo Trident. sess. 23. c. 2. de reform. Statutis. & si à Pontifice confirmari electus debuit, fieri ea non potest, nisi ab ipso Summo Pontifice, aut ex ejus expressa commissione ab aliis Episcopis inferioribus: & quamvis de jure communī à tribus Episcopis Episcopus consecrandus esset; probabilius tamen est, quod ex dispensatione Pontificis ab uno etiam Episcopo, assistantibus duobus Abbatibus, aut alijs in Ecclesiastica dignitate constitutis Presbyteris loco duorum Episcoporum, ubi horum copia haberi non potest, consecrari possit Episcopus, prout testatur Barbosa B. Pium 5. concessisse. & quidem fieri debet hæc Episcopi consecratio inter Missarum solemnia, inter Epistolam & Evangelium, die Dominico, ita ut plenum jus postmodum habeat, non tantum ad eas functiones, quæ jurisdictionis sunt, sed ad ea etiam exercenda, quæ sunt Ordinis Episcopalis; & qua prius obtinebat, beneficia inferiora perfectè jam vacant; c. licet 28. de probend. in 6. si tamen tempus, consecrationi definitum à SS. Canonibus, elapsum jam sit, vel pacificam & utilem sui Episcopatus posse-

sionem jam acquisiverit consecratus Episcopus. Quod si tamen à Pontifice dispensatus fuit confirmatus Episcopus, ut etiam post elapsos tres menses consecrationem accipere non teneatur, certum quidem est, quod ante elapsum longum etiam tempus, ad quod dispensatus fuit, non teneatur consecrationem accipere, probabilius tamen est, quod post lapsum trium mensium spatium, omnia confirmati Episcopi beneficia inferiora vacent, ne melioris conditionis sit, qui Sacros Canones non observat, sub quo-cunque pretextu dispensationem obtinendo ad differendam consecrationem, quam quie eos, consecrationem intra tres menses accipiendo, observat. Quæ tamen hic dicta sunt de beneficiorū inferiorū vacatione in casu consecrationis acceptæ, aut elapsi trimestris spatii, intelligi debent non de Episcopis Titularibus tantum, qui non possunt habere spem pacifica possessionis sui Episcopatus, quorum beneficia nec per consecrationem vacant; nec de illis Episcopis in curia promotis, aut confirmatis, quando in ipso promotionis actu consistorialiter decernit Pontifex, omnia alia promoti beneficia à tempore consecrationis vacare, sed de illis Episcopis, ubi tale decretum non intervenit, & qui pacificam sui Episcopatus possessionem, vel jam obtinent, vel securi sunt de eam obtinendā.



SECTIO